

„Binnema”

Ien fan de moaije pleatsen yn 'e Bird wie neffens myn bernetinzen de pleats fan Roel Nieuwveen, Binnema state. As wy as bern de Bird trochfoeren, dan hie ik foar dy pleats altyd in útsunderlike bilangstelling. As dat kaem fan de foarútboude foarkeamer en de hege beam dat wit ik net mar de pleats fan Roel Nieuwveen luts my oan.

Dat is in 60 jier forlyn en ik hie yn jierren net yn 'e Bird west. Doe't ik der dizze kear, nou op 'e fysts, wer kaem hie Binnema foar my noch neat fan syn moaijens en smûkens forlern.

De tiid wie trochgongen. De Bird wie in stilsteand wetter wurden, in forhurde dyk brocht my fan pleats, der sille oare minsken op 'e pleats kommen wêze, mar sa foar it each wie it Binnema bleaun.

Der wenne nou in oare boer, dat wie my bikend. Yn myn feintejieren hie Roel Nieuwveen boelguod hawn en dérnei binne der oaren kommen en ek wer gien. Nou buo-kje Hette van der Meer en Sietske Hofstra der.

Deroer nije wike mear.

d. H.

Pleats Binnema in
'e Bird bij Grou.



„Binnema” bibuorke troch Hette v. d. Meer

It wie hwat frjemd foar my doe't ik de fyts tsjin de hoksmuorre oan-sette en nei de boerinne, dy't foar hûs dwaende wie, taroun. It wie noch deselde pleats en dochs wie it oars. Ik makke my bikend aan vrou Van der Meer en sei myn boadskip.

„Myn man is yn it lân. As Jo dêr efkes hinne rinne, dy kin Jo grif mear fortelle, alhoewol wy hjir noch net sa lang wenje”.

Ik stapte it lân yn nei de boer ta dy't oan it seadriden wie en holle greppels opfolle. Neidat ik in praetsje makke hie en oer it doel fan myn reis praeete, sei hy: „Ik kin der mar in bytsje fan fortelle. Wy wenje hjir noch mar fan 1962 ôf en foar ús wiene it Homme Jonkman en syn vrou, dy't nou te Nes by Akkrum wenje. Dêr pleats is 33 ha great en wy melke plm. 40 kij en hâlde dêrnest it nedige jongfê. Eigener is nou it Trappisten Kleaster út Tegelen. Dat is eigentlik alles hwat ik sizze kin”.

Doe't ik in praetsje makke oer de foroaring dy't der yn de Bird oer it algemien pleats hawn hie, fortelde de hear Van der Meer: „Dat is in greate forbettering wurden. Nou mei it wetterskip ha se it polderwetter goed yn'e macht en dat komt foaral ús pleats tige to'n goede. Hjir wie noch al hwat dridzich lân, hwerop by wiete simmers it fé net bankje koe. Jo kinne it oan de frucht fan de greppelskanten noch wol sjen. Nei de bettere wetterbi-hearsking is dat gâns better wurden”.

„Soe de pleats earder op in oar plak stien ha”, frege ik wizende op in bosk beammen dy't in eintsje fan de tsjintwurdige pleats ôf stiene. „Né”, fortelde de hear Van der Meer, „dat is in kouwe-tsjerkhôf út de tiid fan de longpest”. Dan hat dy sykte hjir noch al hwat tahâlden, hwant it wie, doe't ik der letter by kaem, noch al in flink stik groun.

„Binnema” komt yn de floreen- en stimkohieren fan Grou foar by nûmer 65 mei ien stim. Eardere eigeners en brûkers ha west:

1640 Doarwaerder Jacob Recolf eigener.

1698 Ald boargemaster Jacob Recolf eigener, Evert Douwes brûker.

1708 Siktaris Van Sminia eigener, Evert Douwes brûker.

1718 Kapt. Aytsma eigener, Wytze Gerbens brûker.

1728 Kaptein Sytsema eigener,

1738 Kaptein Ritsma eigener, selde brûker.

1748 Mefrou A. van Haersma, widd. Camstra, eignerske, Wytze Gerbens widdou brûker.

1758 Mefrou A. van Haersma, widd. Camstra, eignerske fan it hoarnleger mei 1 stim. Grytman H. W. van Camstra eigener fan hûs en lân. Wytze Gerbens widdou brûker.

1768 Frouwe Van Camstra eignerske, Wytze Gerbens widdou brûker.

1778 Frouwe Douairière Van Camstra eignerske, Pytter Jacobs brûker.

1788 Lân-siktaris Van Sminia eigener, Meenze Pytters brûker.

1798 Ald grytman Van Scheltinga eigener, Allardus Andries de Winkel brûker.

1818 Jhr. Ph. Vegelin van Claerbergen eigener, Goaitzen Harmsens brûker.

1828 As yn 1818.

1838 As yn 1828.

1848 Fruchtbrûker Ph. E. A. Vegelin van Claerbergen, M. Bergsma en erven Petrus Andries Bergsma to Idaerd eigeners, Goaitzen Harmsens brûker.

1858 Jacobus Nieuveen en Barteltje Petrus Halbersma eigeners, twadde widdou fan Goaitzen Harmsma brûker.

Oant safier de floreen- en stimkohieren. De pleats sil doe wol in skoft eigen oan de famylje Nieuveen west ha, hwant yn myn bernjejerren wenne der in Roel Nieuveen, letter opfolge f troch Blauke Jonkman en dizze wer troch Homme Jonkman en Tine Vriezem. Sa't ik yn it bigjin al skreau wenje Hette van der Meer en Sietske Hofstra der fan 1962 ôf. Se buorkje der mei twa jonges en ik wol har sukses tawinskje by it buorkjen op Binnema.

d. H.

F HENDRIK GROS 19..-1918
BLAUKE JONKMAN 1917-18